

## ČINIPE-BIČINIPE

Kana si ando phuči pe sar avel pe džikaj diverzne buća thaj so hala pe, na musaj sa te činel pe, jekh alternativa si o čidipe andar e gunoja. Ando svako-đesutno trajo lel pe hasna katar varesave purane buća, purane gada, purane hamaske buća, save si čhudine vaj mekline paša e kontejnerja, te vareko šaj aračhel len. Kova, so aračhel pe thaj či trubul e manuše, šaj del pe ande arli e njamonca vaj komšijenca pala vareso aver vaj šaj bičinel pe pe pišomengo pijaco.

### ČINIPE ANDE PAŠUNE THANA

Ande cara si majbut opcije, kaj šaj činen pe buća pala svako-đesutno trajo. Si bičinimaske thana, ande save šaj činen pe kašteske bijandimata, phuvjače bijandimata, goja, manro, arro, cukro, guglimata, loče pimata, kafa, tutuno thaj alkoholoske pimata, numa e manuša phenen, kaj si kala buća kuč thaj o kvaliteto si čorro. Ande gadala bičinimaske thana, save si paša e cara, e buća save bičinen pe thaj save si pakuime, si butivar 66% maj kuč aj aver buća si dži duvar majkuč no so si ande aver bičinimaske thana thaj pijacurja, save si majdur katar e cara. Paša gadala bare diferencije ando kuči pe, kana trubul vareso pe siđar te činel pe, atoskar majloče si, te bičhalen pe e čavorra, te činen varekaj kaj si paše aj na te džan dur avrjal e cara.

E trgovcurja, save aven ando Beogrado, te bičinen e sezonako phuvjako thaj kaštesko bijandipe, von bičinen po milaj kala lačhimata vi angla lenđe čhera. Kana thaj kana aven ande Gazela vi dromeske trgovcurja.

### ANDO TRUJALIFE

Trujal e cara si diferentne thana kaj šaj činel pe so trubul. Majpaše si o kiosko, savo si pe autobusoski ačhavni, kaj majanglal šaj činel pe tutuno, pimata thaj guglimata, thaj paše si vi o kiosko pala habe pe siđar.

Trujal e cara si vi e pekare thaj mini-marketurja, save učaren thaj inčaren sa godola buća, save trubun e manušen pala piro svako-đesko trajo. Te vareko mandel te činel vareso, thaj te avel les maj buhlo losaripe, atoskar musaj te džal ande baro supermarketo *Super Vero*, savo si deš minaturja dur katar e cara.

Paša supermarketo si vi jekh baro pijaco po putardo than, savesko alav si *Buvlja pijaca*, pe savo šaj malaven pe savorra buća aj hamaske buća šaj numa malaven pe savatone. Po *Treći bulevar*, o sokako savo džal džikaj *Buvlja pijaca*, unzaren savko đes trgovcurja katar pišomengo pijaco ₣ pire buća; but lendar si manuša andar e Gazela.

Varekazom kilometrurja katar e cara, ando *bloko 70*, si vi o kinesicko bičimasko centro *kineski tržišni centar*, ande savo šaj činen pe buća katar o durutno istoko, save bičinen e manuša, save si migranturja andar e Kina. Kate šaj činen pe drze pala cikne love thaj godova del o šaipe, te vi e manuša, save trajin ande Gazela činen pala peste kana thaj kana nevo furjavipe. ■

E pišomengo pijaco  
→ r. 94

